

Opšti uslovi izlaganja na Sarajevskom sajmu

Član 1

Organizator

Sve sajmove organizuje KJP Centar Skenderija d.o.o., Terezije b.b., 71 000 Sarajevo, Bosna i Hercegovina (u daljem tekstu i tekstu ugovora Sarajevski sajam).

Član 2

Prijava i potvrda o učešću

O učešću na sajmu Izlagač sa Sarajevskim sajmom pismeno zaključuje prijavu izlaganja-ugovor o zakupu izložbenog prostora (u daljem tekstu prijava). Na osnovu zaprimljene prijave Sarajevski sajam će izvršiti raspodjelu izložbenog prostora. Sarajevski sajam može, ako sajamski raspored to zahtjeva, dodjeliti do 10% veću ili manju površinu od prijavljene, koja se neće obračunavati.

Ukoliko Izlagač u pismenom obliku predloži Sarajevskom sajmu povlačenje svoje prijave najkasnije 30 dana prije početka sajma i ako Sarajevski sajam to prihvati, Izlagač nema pravo na povrat kotizacije određene Uslovima plaćanja (član 3) i dodatno mu se fakturiše 25 % ugovorene vrijednosti neuređenog prostora. Otkaz 30 dana i manje do početka sajma Sarajevski sajam ne može prihvatiti, pa će podnosiocu prijave pored zadržavanja kotizacije fakturisati naručeni neuređeni izložbeni prostor i sve do tada izvršene usluge koje se Izlagač obavezuje izmiriti. U slučaju neplaćanja svih ugovorenih obaveza do 8 dana prije početka sajma Sarajevski sajam ima pravo smatrati odustajanjem od izlaganja pa će podnosiocu prijave pored zadržavanja kotizacije biti fakturisan naručeni neuređeni izložbeni prostor i sve do tada izvršene usluge.

Ako posebne okolnosti zahtjevaju Sarajevski sajam ima pravo opozvati potvrđeni prostor i Izlagaču dodjeliti novi prostor na novoj lokaciji i po novim uslovima.

Ako se iz objektivnih razloga vrijeme i prostor održavanja sajma mora promijeniti, prijava sudjelovanja vrijedi za novi termin. Izlagač nema pravo otkazati ili postavljati neke druge zahtjeve, a pogotovo nema pravo tražiti naknadu štete od Sarajevskog sajma, eventualno prouzrokovane pomjeranjem termina ili prostora održavanja.

Zadnji rok prijave je rok označen na Prijavnom obrascima izlaganja (obrazac 1). Rok za narudžbu ostalih usluga je rok naveden u narudžbenicama. Sarajevski sajam ne može prihvatiti otkaz naručenih tehničkih usluga najmanje od 8 dana prije početka sajma.

Član 3

Uslovi plaćanja

Za naručene usluge Sarajevski sajam će Izlagaču po prijemu prijave ispostaviti predračun. Na ime kotizacije izlagač odmah po prijemu predračuna plaća 20 % od profakturisanog iznosa, a ostatak je obavezan uplatiti u ugovorenom i na profakturi naznačenom roku ili rokovima, u koliko je ugovoreno višekratno plaćanje.

Nakon završetka sajma Sarajevski sajam će dostaviti izlagaču konačan račun za sve usluge. Za svaki dan zakašnjenja kod plaćanja računa zaračunavamo zakonom propisanu zateznu kamatu. Ako izlagač ima reklamaciju na dio računa, nesporni dio dužan je platiti prema našim uslovima. Reklamacija na račun dostavlja se u pismenoj formi u roku od 5 dana od datuma prijema računa. Naknadni prigovori se neće uzeti u obzir.

Cijene ne sadrže zakonski porez na dodatu vrijednost - PDV.

Član 4

Posebne odredbe

Pravo da odobri obavljanje bilo kakvih djelatnosti na prostoru sajma (uređenje štandova, ugostiteljstvo, prodaja, špedicija, snimanje i sl.) pripada isključivo Sarajevskom sajmu. Smatra se da je za primanje obavjesti, preuzimanje usluga, odnosno odobrenje narudžbi u ime izlagača ovlaštena osoba koja je zatečena na štandu, s tim da se u narudžbi, odnosno priznanici, upisuje ime, prezime, matčni broj i broj lične / osobne karte te osobe.

Ekonomsko-propagandne aktivnosti na prostoru sajma mogu se organizovati u skladu sa propisima Bosne i Hercegovine. Zabranjena je svaka reklama koja ometa ostale izlagače ili posjetioce kao i bilo koji oblik političko-propagandne aktivnosti. Za sve reklamne akcije izvan izložbenog prostora Izlagača potrebno je posebno odobrenje Sarajevskog sajma. Na štandu se ne dopušta upotreba elektronskih uređaja koji proizvode nivo buke veći od 65 decibela. Puštanje muzike na izlagačkom prostoru podliježe Zakonu o autorskim pravima BiH i Sarajevski sajam ne preuzima materijalnu odgovornost za nastale obveze na toj osnovi.

Organizacija konferencija za novinare obavezno se unaprijed prijavljuje Sarajevskom sajmu.

Član 5

Izložbeni prostor – neuređeni

Neuređeni prostor podrazumjeva označenu tlocrtnu površinu u paviljonu ili na vanjskom prostoru, bez ikakvih priključaka. Površinu označava Sarajevski sajam i Izlagač se obavezuje poštivati označeni prostor. Svaki započeti kvadratni metar više od rezervisanog zaračunava se kao puni 1m². Pojedini izlagač ne može ustupiti dodijeljeni izložbeni prostor drugome bez suglasnosti Sarajevskog sajma. Izlagač zauzima štand nakon što mu Sarajevski sajam izda dozvolu za rad u pismenoj formi.

Ako Izlagač ne počne uređivati izložbeni prostor najkasnije 36 sati prije otvaranja sajma, smatra se da izložbeni prostor nije zauzet, pa Sarajevski sajam ima pravo raspolagati tim izložbenim mjestom, odnosno urediti ga na teret izlagača.

Priprema i raspremanje izložbenog prostora može početi u skladu sa terminom navedenim u «Uputama za izlagače» koje se izlagaču dostavljaju uz fakturu.

Na zahtjev Izlagača Sarajevski sajam može odobriti uređenje izložbenog prostora i ranije, s tim da će zaračunati posebne troškove. Raspremanje izložbenog prostora može započeti nakon službenog završetka sajma. Izlagač je dužan dovesti izložbeni prostor u prvobitno stanje u zadanom roku. U koliko to ne učini Sarajevski sajam će rasporemiti i uskladištiti materijal na trošak izlagača.

Član 6

Uređeni izložbeni i reklamni prostor

Uređeni izložbeni prostor podrazumjeva prostor minimalno opremljen tepihom te pregradnim stijenama najveće dopuštene visine do 250 cm (uključujući i natpise), odvojen prema susjednim štandovima.

Reklamni prostor podrazumjeva svaku površinu izvan izložbenog prostora, kao i onu koja prelazi visinu od dopuštenih 250 cm, uz uslov da visina ne smeta ostalim izlagačima te da je stručna služba Sarajevskog sajma dala svoje odobrenje. Reklamni prostor naplaćuje se u skladu s važećim cjenovnikom Sarajevskog sajma.

Član 7

Dozvola za izgradnju izložbenog prostora

Dozvola za izgradnju izložbenog prostora izdaje se ovjerom projekta. Pod projektom se podrazumjeva skica ili druga projektna dokumentacija tehnički izrađena i ovjerena te usklađena sa «Pravilima o uređenju izložbenog prostora». Projekt se podnosi na odobrenje Sarajevskom sajmu najkasnije 30 dana prije početka sajma. Izlagač je obavezan termin dovoza svoje opreme i izložbenih eksponata pismeno najaviti najmanje 7 dana prije početka sajma.

Član 8

Ostale tehničke informacije

- a.) Sve priključke instalacija obavlja isključivo Sarajevski sajam.
- b.) Upotreba električne energije obračunava se paušalno po m² unutrašnjeg izložbenog prostora, po broju priključaka i po brojilu.

c.) Izlagač mora dopustiti prolaz cijevi i ostalih instalacija potrebnih za tehničko i dekorativno uređenje štanda ili izložbenog prostora drugog izlagača ili sajma uopšte. Ako izlagač, odnosno ovlašteni izvođač radova, započne izložbeni i reklamni prostor uređivati bez odobrenja, Sarajevski sajam će zabraniti daljnje radove, odnosno ukloniti izrađeni dio na teret izlagača.

d.) Najveće opterećenje poda u prizemnom holu Dvorane 1 i na parkingu je neograničeno, dok je u svim drugim dvoranama, holovima, platou i drugim prostorima 0,4 tone na m². Učvršćivanje, vješanje i ljepljenje na zidove, stropove i podove nije dopušteno.

e.) Radovi na uređenju izložbenog i reklamnog prostora moraju se dovršiti dan prije otvaranja sajma i to najkasnije do 18 sati. Ako se taj rok ne poštuje, Sarajevski sajam je ovlašten da preostale radove povjeri drugom izvođaču na trošak Izlagača.

f.) Reklamacija zbog eventualnih nedostataka izložbenog prostora ili štanda moraju se javiti Sarajevskom sajmu pismenim putem nakon preuzimanja štanda, ali najkasnije do 12 sati posljednjeg dana priprema. Naknadne se reklamacije ne mogu uzeti u razmatranje.

g.) Izlagač je prilikom pripremnog perioda, perioda održavanja sajma i raspremnog perioda dužan pridržavati Zakona o zaštiti na radu, Zakona o zaštiti od požara Zakona o zaštiti okoline i Kućnog reda Sarajevskog sajma i snosi punu odgovornost za eventualnu štetu nastalu uslijed nepridržavanja navedenih Zakona.

h.) Štetan i opasan otpad i drugi otpad izlagač je dužan odlagati na za to određeno mjesto.

i.) Pod pojmom «Izlagač» smatraju se i osobe koje rade prema nalogu i za račun Izlagača.

Član 9

Ostale sajamske usluge

a.) Čuvanje i osiguravanje – Izlagač može od Sarajevskog sajma naručiti čuvanje svog izložbenog prostora što se posebno zaračunava. Za neizvršeno osiguranje izložbenih eksponata i ostale imovine Sarajevski sajam ne preuzima odgovornost, već iznos nastale štete pada na teret Izlagača. U slučaju nastanka štete (krađa, oštećenje i sl.) Izlagač je dužan nastalu štetu u najkraćem roku prijaviti Sarajevskom sajmu.

b.) Izlagačke propusnice – Izlagačke propusnice vrijede od prvog dana priprema sajma do zadnjeg dana raspremanja. Broj pripadajućih propusnica zavisi o veličini zakupljenog prostora. Za štand veličine do 20 m² ili vanjski prostor do 40 m² – 4 propusnice, a za svakih daljnjih 10 m², odnosno 20 m² vanjskog prostora, po jedna.

c.) Regulisanje prodaje – Direktna prodaja izložbenih eksponata i uzoraka nije dozvoljena osim na za tu svrhu posebno određenim prostorima. Izlagač je dužan u skladu sa zakonskim propisima pripremiti svu potrebnu dokumentaciju koju zahtjevaju nadležne inspeksijske službe.

d.) Katalog izlagača – Uvrštenje u katalog je obavezan. Izlagač je dužan dostaviti Sarajevskom sajmu podatke za upis u katalog 30 dana prije početka sajma (obrazac 3). Ako ih ne dostavi, Sarajevski sajam će unijeti u katalog osnovne podatke iz prijave izlaganja. Za sadržaj upisa u katalog i sadržaj oglasa,

kao i za štetu nastalu zbog neodgovarajućeg teksta, odgovoran je Izlagač, pa za eventualne netačnosti i nepotpunosti u katalogu Sarajevski sajam ne preuzima odgovornost.

Član 10

Završne odredbe

Sarajevski sajam izdaje za svaki sajam posebne «Upute za izlagače», koje su uz ove «Opšte uslove izlaganja», ugovorna obvezna za svakog izlagača i suizlagača.

Mjesto izvršenja obaveza i plaćanja je Sarajevo.

U slučaju spora između Izlagača i Sarajevskog sajma stranke se podvrgavaju odluci stvarno nadležnog suda u Sarajevu. (tekst sa prijavnih materijala)